

व प्रधानमंत्री नरेन्द्र मोदी अहमदाबाद विमान हादसा मांय जीवित बच्चा एकला जणा अर ज़ख्मी व्हेवण वाळा सागे मुलाकात कीनी—वे हादसा री ठौड़ रो दौरो कर र अहलकारां सागे मीटिंग कीनी।

व प्रदेश मांय पड़ रही ज़ोरदार गर्मी बीचे श्रीगंगानगर मांय 49 दशमलव 4 डिग्री सेल्सियस तापमान दर्ज करी ज्यो।

व मुख्यमंत्री भजनलाल शर्मा री सदारत मांय पी.डब्ल्यू.डी. रा अहलकारां री मीटिंग।

व राज्य मांय नकली खाद अर मिलावटी बीज बेचण वाळी कम्पनियां सागे मिलीभगत रा आरोप मांय कृषि विभाग रा 11 अहलकार मुअत्तल करी ज्या।

000

प्रधानमंत्री नरेन्द्र मोदी अहमदाबाद मांय काल व्हया विमान हादसा रे कारण ज़ख्मी लोगां सागे आज मुलाकात कीनी। वे अहमदाबाद रा सिविल अस्पताल रो दौरो कर र हादसा मांय बच्चा एकला मुसाफिर रमेश विश्वास कुमार ऊं ई मुलाकात कीनी। प्रधानमंत्री हादसा री ठौड़ रो ई दौरो कर र राहत रा काम मांय लाग्योड़ा अहलकारां सागे बातचीत कर र हालात रो जायजो लीनो। ई पाछे प्रधानमंत्री अहमदाबाद मांय गुजरात रा मंत्रियां अर आला अहलकारां सागे मीटिंग कीनी। श्री मोदी हादसा मांय मर्या गुजरात रा पैली वाळा मुख्यमंत्री विजय रूपाणी रा पिरवार वाळा सागे ई मुलाकात कीनी। प्रधानमंत्री हादसा माथे गहरो दुःख जताता थकां कह्यो के पीडित पिरवारां रा दुःख अर नुकसाण ने म्हां भलीभांति समझां हां। ई बीचे गुजरात आतंकवाद निरोधी दस्तो अहमदाबाद विमान हादसा री ठौड़ ऊं एक डिजिटल वीडियो रिकॉर्डर बरामद कीनो है। हालांकि एयर इण्डिया हाल तांई ब्लैक बॉक्स मिलण री आधिकारिक तौर ऊं पुष्टि नी कीनी है। ई बीचे हादसा मांय ज़ख्मी लोगां री जान बचावण सारु मोटी तादाद मांय लोग खून दान करण सारु सिविल अस्पताल पूग रह्या है। दूजी कानी हादसा मांय मरण वाळा री लाशां पोस्टमार्टम पाछे वां रा पिरवार वाळा या जाणकारां ने सूंपी जा रही है। ओ हादसो ओजू ज़िन्दगी री अनिश्चितता रो सबक सिखायो है।

लोकसभा अध्यक्ष ओम बिरला कह्यो है के पूरो देश ई हादसा ऊं दुःखी है अर पीडित पिरवारां सागे सगळा री संवेदना है। श्री बिरला आज वां रा संसदीय क्षेत्र कोटा—बूदी मांय बूदी जिला रा डाबी गांव मांय नानक भील रा शहादत दिवस रे मौके राख्यी ज्या कार्यक्रम मांय बोल रह्या हा।

000

प्रदेश मांय भीषण गर्मी अर लू बीचे आज श्रीगंगानगर मांय पारो 49 डिग्री सेल्सियस ने पार कर ग्यो ज्यो लारला 35 साल मांय सब ऊं बत्तो है। चूरु मांय ई अधिकतम तापमान 47 डिग्री सेल्सियस ऊं ऊंचो दर्ज करी ज्यो। दूजी कानी तेज़ तपन बीचे केई ठौड़ां मौसम पलट ग्यो। दोपहरां पाछे झुंझुनूं कोटपूतली—बहरोड़, भरतपुर अर बारां मांय आंधी चालण पाछे बिरखा व्हेवण ऊं मौसम खुशनुमा व्हे ग्यो। राजधानी जयपुर मांय ई बादलां री आवा—जाही रही। मौसम विभाग आज केई ठौड़ां ज़ोरदार बायरो बाजण सागे बिरखा व्हेवण सारु चेतायो है। जयपुर, भरतपुर, बारां, झालावाड अर सीकर ज़िलां मांय कठे—कठे हल्की ऊं मझला दर्जा री, जदके अलवर, चूरु, अजमेर, दौसा, करौली, धौलपुर अर कोटा समेत कठे—कठे हल्की बिरखा रा आसार है। ई बीचे राज्य मांय काल चौमासा ऊं पैली रा छांटा—छिड़का रो दौर सरु व्हेवण री संभावना है। मौसम केन्द्र जयपुर रा निदेशक राधेश्याम शर्मा बतायो के कोटा अर उदयपुर संभाग मांय इण री सरुआत व्हे सके है, जिण रे धीरे—धीरे आगे बढ़ता थकां 20 जून तांई जयपुर अर भरतपुर संभाग तांई पूण रा आसार है।

राज्य मांय बेगी ई चौमासा री बिरखा सरु व्हेवण रा आसार है। इण ने ध्यान राखता थकां बाढ़ अर पाणी भरण रा हालात मांय पशुधन री हिफाजत रा ज़रुरी प्रबंध करया जावेला। पशुपालन विभाग रा निदेशक डॉ. आनन्द सेजरा बतायो के ढांढा—ढोरा रा स्वास्थ्य री हिफाजत सारु जरुरी दिशा—निर्देश जारी करी ज्या है। ई रा तैत राज्य मांय 15 जून ऊं ज़िला स्तर माथे बाढ़ नियंत्रण कक्ष काम करणे सरु करेला। ई सागे ई ज़िला अर उपखंड लेवल माथे ई नोडल अहलकार लगाया जावेला।

मुख्यमंत्री भजन लाल शर्मा री सदारत मांय आज व्ही पी.डब्ल्यू.डी. रा अहलकारां री मीटिंग मांय बुनियादी ढांचा विकास ऊं जुडी परियोजनावां रा बारा मांय चर्चा करी ज्यी। श्री शर्मा री सदारत मांय काल मंत्रिमंडलीय उपसमिति री मीटिंग रो ई प्रस्ताव है। इण मांय नगरीय निकायां री सीमा ओजू तैय करण अर पुनर्गठन प्रस्तावां रा बारा मांय चर्चा व्हेवण रा आसार है। ध्यानजोग है के 27 अर 28 मई ने व्ही मीटिंग मांय अजमेर, कोटा, उदयपुर, बीकानेर, जोधपुर, भरतपुर अर जयपुर संभाग ऊं जुड़या निकायां रा पुनर्गठन ऊं जुड़या प्रस्तावां माथे चर्चा करीजी ही।

प्रदेश मांय नकली खाद अर मिलावटी बीजां रे खिलाफ कृषि विभाग री ओर ऊं चलायी जा रही मुहिम रा तैत आज आरोपित 11 अहलकारां ने काम मांय कोताही करण अर खाद—बीज री कम्पनियां सागे मिलीभगत करण रा आरोप मांय तुरत मुअत्तल कर दिया ज्या है। कृषि मंत्री किरोड़ी लाल मीणा रा हुकम पाछे शासन उपसविव नवरत्न कोली कानी ऊं जारी हुकम रे मुजब आं अहलकारां माथे माफिया सागे गठजोड़ कर र किसानां ने घटिया खाद—बीज री पूर्ति करण रो आरोप है।

एंटी गैंगस्टर टास्क फोर्स जयपुर कने चाकसू ऊं करीब सवा चार सौ किलोग्राम गैर—कानूनी गांजो ज़ब्त कर र दो तस्करां समेत पांच जणां ने गिरफ्तार कीना है। अतिरिक्त पुलिस महानिदेशक दिनेश एम.एन. बतायो के ओ गांजो दवाइयां री आड़ मांय एक ट्रक ऊं छत्तीसगढ़ ऊं तस्करी कर र जयपुर लायो जा रह्यो हो। वे बतायो के ट्रक सागे चाल रही एक कार ऊं गैंग रा सरगना समेत तीन जणां ने पकड़ी ज्या। बरामद करी ज्या गांजा रो मोल दो करोड़ रुप्या मानी ज्यो है।

21 जून ने मनायो जावण वाळो अंतर्राष्ट्रीय योग दिवस ज्यों—ज्यों नजदीक आ रह्यो है त्यों—त्यों शहरां अर गांवां मांय प्रोटोकॉल अभ्यास कर्यो जा रह्यो है। आयुष मंत्रालय री ओर ऊं काल नई दिल्ली मांय योगा कनेक्ट वैश्विक सम्मेलन राख्यो जावेला। विज्ञान भवन मांय व्हेवण वाळा ई सम्मेलन मांय देश—परदेश रा योग गुरु, नीति निर्माता, स्वास्थ्य विशेषज्ञ, शोध करण वाळा अर सोशल मीडिया इन्पलुएंसर्स शिरकत करेला। राज्य मांय ई पाली अर हनुमानगढ़ ज़िलां मांय न्यारी—न्यारी ठोड़ा शिविर लगा र काउंट डाउन योगाभ्यास रा आयोजन कर्या जा रह्या है। हनुमानगढ़ मांय अ शिविर 30 जून ताई लगाया जावेला। ई दौरान आयुर्वेद विभाग योगाभ्यास सागे ईलाज रा देशी तरीकां अर आयुर्वेद रे प्रति जाग जगा रह्यो है। 16 जून ने विधानसभा परिसर मांय योगाभ्यास रो कार्यक्रम राख्यी ज्यो है। विधानसभा अध्यक्ष वासुदेव देवनानी री मौजूदगी मांय विधायक अर विधानसभा रा कर्मचारी अर अहलकार न्यारा—न्यारा आसनां रो अभ्यास करेला। श्री देवनानी योग ने सनातन री महान विरासत बताता थकां कह्यो के इण ने आमजन री जिन्दगी रो अटूट हिस्सो बणावणो व्हेला। वे कह्यो के योग भारत री देन है अर मौजूदा दौर मांय 193 देशां मांय योग दिवस मनायो जा रह्यो है। अंतर्राष्ट्रीय योग दिवस रा सिलसिला मांय आकाशवाणी जयपुर रा क्षेत्रीय समाचार एकांश री ओर ऊं संदेश श्रृंखला चलायी जा रही है। आज पेश है जयपुर रा आयुर्वेद कॉलेज मांय योग री विभागाध्यक्ष डॉ. गुंजन गर्ग रो संदेश। वां रो कहवणो है के भागम—भाग री ज़िंदगी मांय तनाव ऊं बचाव मांय योग मददगार है।

काल विश्व रक्तदाता दिवस मणायो जावेला। खूनदान रे मार्फत लोगां री जिन्दगी बचावण रा बारा मांय जाग जगावण सारू हर साल 14 जून ने ओ दिन मनायो जावे है। विश्व रक्तदाता दिवस री पैली वाळी सांझ आज पाली मांय जागरुकता रैली निकाळी ज्यी। ईं दौरान सरकारी बांगड अस्पताल रा अधीक्षक डॉ. एच.एम. चौधरी खूनदान करण री शपथ दिरायी। हनुमानगढ मांय आज मानस अभियान रा तैत नशा मुक्ति शिविर लगायी ज्यो। ईं दौरान करीब डोऱ सौ मरीजां री समझाइश कर र वां ने नशो छोड़बा री सीख दीरीजी।